

Ekwo-ozì, E Deru Nụ Ndu Hiburù

Opfu, Chileke shi l'ọnu Nwa iya epfu

1 ¹Lẹ teke k'azụ bẹ Chileke shi l'ọnu ndu mpfuchiru iya pfuru nụ ndiche anyi phẹ ugbo olemole l'uzo, dughbaa iche iche. ²O be lẹ nta, bụwaa ikpazụ-a; ọ bụru onye bụ Nwa iya bẹ o gude pfuru nụ anyi. Ọ bụru l'ẹka Nwa iya ono bẹ ọ gbẹ mee mgboko mgburugburu; ẹme ọ họtakwa iya phọ sụ l'ọo ya bẹ iphemiphe kuru ishi l'ẹka. ³Nwa ono egbu nwiiinwii; shi egube ono egoshi l'o nọpfo gẹ Chileke egbu nwiiinwii bụ ono; ẹme ọ buerupho gẹ Chileke dụ bụ g'ọ dukota kpamu. Opfu, Nwa iya ono pfuru ereshi ire ike. Ọ bụru ire ono, oore ono bẹ o gude gudesia mgboko mgburugburu. Ọ safuchaaru ndiphe iphe-ẹji phẹ; ọ gbeshi je anọdu anọ l'imigwe l'ẹkutara Chileke, bụ iya bụ onye ono, kakọta ike.

Nwa ono ka ojozi-imigwe

⁴Nwa ono bẹ Chileke meru; ọ nyibekota unwu-ojozi-imigwe; ọ bụkwarupho egube ono bụ g'ẹpha, Chileke guru iya dangokwarupho ẹpha k'unwu-ojozi-imigwe. ⁵Lẹ-a; ?bụ ojozi-imigwe ole bẹ Chileke sụjeru:

“Oo ngu bụ Nwa mu nwoke.

E -shi ntanụ-a bẹ mu
bụwaa Nna ngu.”

Ọzo bụru:

“Mu a-bụru iya Nna;
l'ọo-bụru mu Nwa.”

⁶Temanu kwaphọ teke Chileke dubataru Nwa iya ono, bụ ọkpara iya ono lẹ mgboko bẹ ọ sụru:

“G'iphe, bụkpoo
unwu-ojozi-imigwe
kẹ Chileke l'ophu
bakotakwaru iya ẹja.”

7A bya l'eka k'unwu-ojozi-imigwe; o buru iphe, Chileke pfuru bu:

“O meru
 unwu-ojozi-imigwe
 iya ephe buru pherephere;
 bya emee ndu-ozii ya
 ephe buru oku,
 enwu phoophoophoo.”

8A byakwanu le ke Nwa Chileke obu o su:

“Aba-eze ngu gube
 Chileke a-no ojeje.
 O buru apfubekoto
 a-buru mgboro-onye-eze,
 ii-gude buru eze obu.

9 Iphe, pfuru oto du ngu ree;
 iphe,
 apfuduru-oto dukwanu
 ngu ashi.

Noo g'o gude Chileke ono,
 bu Chileke ngu ono hota ngu;
 bya akwabeg ngu ubvu;
 mee ehunodu atso
 ngu utso;
 ubvu me ehunodu
 ophu kwata ka ke ndu
 unu lephe gba nanu shii.”

10 Ozo buru;

“E -shikpo le mbu bu
 gube Nnajiuphu
 meru ali mee iphe,
 no iya nu;
 teme o buru ngu gude
 eka ngu mee igwe;
 bya emee iphemiphe,
 no iya nu.

11 Iphemiphe ono e-mechaa
 mebyishihukota;
 obenu le gubedua
 l'a-du gi du.

Iphemiphe ono
 e-mechakwaa kashihu
 g'uwe.

12 L'ipyakobe phe g'a

pyakoberu ukpo;
 woru phẹ gbanwee
 g'a gbanweru uwe.
 Obenu lẹ gubedua
 buẹpho onye ị bu bẹ
 ị bu;
 Ị nọwaa g'ii-nọdu
 jasụ lẹ tuutuutuu
 lẹ mịimiimii.”^a

13 Tọo ?bu ojozi-imigwe ole bẹ Chileke sụjeru:

“Nọdu mu l'ẹkutara
 jasụ teke mu
 e-me ndu ọhogu ngu
 g'ẹphe buru iphe,
 ịi-zọpẹyabe l'ọkpa?”^b

14 Sụ-a; ?bu gunu bẹ unwu-ojozi-imigwe bukpo? Ẹphe tukuru buru unwu-ojozi, a taa humadu l'ẹnya, ejegbaaru Chileke ozi; bya aburu ndu Chileke yeru g'ẹphe bya eyeru ndu oo-mechaa dzọta ẹka.

Ndzọta, parụ ẹka

2 ¹Noo g'o gude anyi jee eyefutaru ẹhu l'opfu ono, anyi nọmaru ono-ya; g'anyi ta akponyaa gẹ gẹ gẹ kpofu. ²Kẹle ọ -buru l'ozu ono, unwu-ojozi-imigwe zihawaru onoya bẹ meru g'a maru l'opfu Chileke ono ere ire; k'ophu ndu jikaru iya nụ yẹle ndu jikaru eme iphe, Chileke pfuru bẹ ọ gwaru ọchi, bu iphe, gbaru phẹ nụ; ³?denu g'anyi e-shi nahu mẹ ọ -buru l'anyi weru eze ndzọta ono gbẹgelegbegele, bu ọphu Nnajiuphu vuhawaa ọzo pfua opfu iya; ndu nọmaru iya nụ byakwanu bya emee g'anyi maru l'ọ bu eviya. ⁴Chileke l'onwiya goshikwapho l'ọ bu eviya teke ono, o gude ike iya meshia iphe-ohumaleny, dugbaa biribiri bya eworu iphe-oma, shigbaa Unme-du-Nso l'ẹka keshikwaarupho ndu kweru nkiya g'ọ du iya g'o kee ya ono.

Jizọsu egoshi ọzo ndzọta

⁵Lọ tọ bukwa unwu-ojozi-imigwe bẹ Chileke meru g'ẹphe buru ishi lẹ mgboko ono, e-mechaa bya nụ ono, bu iya bu mgboko ono, anyi epfu opfu iya ono. ⁶Lọ chia iphe, Chileke meru bunua g'e pfuru l'ẹkwo-opfu iya sụ:

“Gube Chileke;
 ?bu gunu bẹ nemadzu
 bu kẹ g'ị ri-vuje iya?”

^a 1:10-12 Gụnaa Ebvu 102:25-27. ^b 1:13 Gụnaa Ebvu 110:1.

- ?Bụ ụ́nụ́ b'ọ́ bụ́ kẹ́
 g'i letajẹ́ iya ẹńya?
 7 I meru iya ọ́ ka
 ụ́nwu-ọ́jozi-imigwe
 ọ́lwalí;
 nọ́ọ ọ́du nwanshíí;
 bya eworu
 ogbu-nwíinwíí yẹ́lẹ́
 ọ́kwabẹ ụ́bvù gude
 kpube iya okpu-eze;
 8 bya emee ya ọ́
 nọ́ngokota iphemiphe,
 i meru ememe.”^c

Eshinu o meru iphemiphe nọ́du iya l'ẹ́ka; bụ́na iya bụ́ l'ọ́ tọ́ dudu g'ọ́ ka mma l'ọ́o iphe lanụ́, ọ́ gụ́furu. Obenu lẹ́ nta-a bẹ́ e teke ahụ́madu g'o shíru bụ́ru ishi iphemiphe. ⁹Ọ́ chia Jizọ́su bẹ́ anyi hụ́maru g'e meru iya ọ́ ka ụ́nwu-ọ́jozi-imigwe ọ́lwalí nọ́ọ ọ́du nwanshíí; onye e kpuberu okpu-eze, dọ́ biribiri yẹ́lẹ́ ọ́kwabẹ ụ́bvù k'ọ́phu o shi l'eze-iphe-ọ́ma ọ́phu Chileke eme nwụ́hu-chíru onyemonye. ¹⁰Ọ́ bụ́leru-a yẹ́bedua, bụ́ Chileke, iphemiphe shi l'ẹ́ka tẹ́me ọ́ bụ́ru iya nwe iphemiphe bẹ́ ọ́ gbaru l'eshi l'iphe-ẹ́huka, onye-ndzọ́ta ono jeru dzugbua oke l'ẹ́hu iya; shi nno mee ndu dọ́ igwerigwe g'ẹ́phe bụ́ru ndu egbu nwíinwíí.

¹¹Lẹ́ yẹ́bedua ono, bụ́ Jizọ́su ono, emeje gẹ́ nemadzọ́ dọ́ebe ree l'iphu Chileke onoya; mẹ́ ndu ọ́bu, o meru g'ẹ́phe dọ́ebe ree ọ́bu tų́kokwaru shi lẹ́ nna lanụ́ ono. Noo g'o gude ọ́phu iphere adų́jedu iya eku phẹ́ ụ́nwunna iya. ¹²L'ọ́ sų́kwaru:

“Mu e-me g'ụ́nwunna
 mu maru ngu;
 mu a-nọ́du l'edzudzu-ọ́ha
 gua ebvu jaa ngu ajaja.”^d

¹³Bya asų́kwapho: “Ọ́o ya bẹ́ mu a-dakobe.” Sų́kwapho; “Wakwa mu nọ́ l'ẹ́ka-a mu l'ụ́nwegirima ono, Chileke chíru nụ́ mu ono.”

¹⁴Eshinu ụ́nwegirima onoya bų́gbaa nemadzọ́, furu ẹ́ka fua ọ́kpa bẹ́ ọ́ gbẹ́shierupho bya abụ́ru nemadzọ́ g'ẹ́phe bụ́. Iphe, o gude mee nno bụ́ g'oo-shi l'anwụ́hu, ọ́ nwụ́huru mebyia ike onye ono, bụ́ iya bẹ́ anwụ́hu gude ere ire; onye ono bụ́ Obutuswe. ¹⁵Ọ́o ya bụ́; o shi l'anwụ́hu ono, ọ́ nwụ́huru ono tọ́o phẹ́ l'ẹ́gbu; mbụ́ ndu ono, shi eshinu ẹ́phe fų́taru l'eliphe nọ́du bụ́ru ohu ono; opfu l'ẹ́phe atsụ́ ebvu anwụ́hu. ¹⁶Lẹ́-a; ọ́phu doru ẹńya bụ́ l'ọ́ tọ́ bụ́du ụ́nwu-ọ́jozi-imigwe bẹ́ ọ́ byaru g'o yeru ẹ́ka; ọ́o oshilọ́kpa Ẹ́biríhamu phẹ́. ¹⁷Noo g'o gude ọ́ bụ́ru iphe, rwuberu iya erwube

^c 2:8 Ụ́nụ́na Ebvu 8:4-6. ^d 2:12 Ụ́nụ́na Ebvu 22:22.

l'ò byafutaje bya aburu nemadzu g'unwunna iya bu l'uzo iphemiphe. Oo ya bu g'oo-shi egube ono buru phe onye-ishi uke ke Chileke; buru onye obu-imemini; bukwarupho onye e gude ire iya aka l'iphemiphe, oomeru Chileke; g'ee-shi egube ono ge Chileke aguru ndiphe nvu l'iphe-aji phe g'o ha. ¹⁸Yebdua l'onwiya jewaru iphe-ehuka; teme ohtama byapfutakwaa ya pho. Noo g'o gude o nodu aduje ike yeru ndu ohtama byapfutaru aka nta.

Jizosu kakwapho Mosisu

3 ¹Oo ya bu le-a; unwunna mu, du nsò, bu ndu a gbekwapho l'imigwe kua; unu rijekponaa oriri ke Jizosu ono, bu onye-ishi-ozì; waa onye-ishi uke Chileke me a -bya l'iphe ono, anyi suru l'o bu okpobe-opfu ono. ²Le yebdua goshiekwarupho Chileke ono, hotaru iya g'o buru onye-ishi uke iya ono le ya bu onye o gude ire iya aka; egube e gudekwapho ire Mosisu aka l'ozì, o jeru ndu onu-ulo iya. ³Ole o gbakwaru g'a ka aja Jizosu ajaja eme le Mosisu; mbu egube ono aakaje akwabe onye kpuru ulo ubvu; eme l'ulo obu l'onwiya ono. ⁴A makwaru-a l'o to dudu ulo, abudu nemadzu kpuru iya; obenu l'oo Chileke bu onye mekwanuru iphemiphe. ⁵Su-a; Mosisu bukewapho onye-ozì kpù. O goshiru Chileke le ya gbaru g'e gude ire iya aka l'ozì, o jeru ndu Izurelu l'ophu, bu ndu onu-ulo Chileke. O buru iya goshiru iphe, Chileke mechaaru mee l'iphu. ⁶A byakwanu le Kereshi; o buru Nwa, eleta ulo Nna iya enya. Nna iya ono bu Chileke. O goshikwapho Chileke l'o gude ire iya aka. O buru anyi bu onu-ulo Nna iya obu me o -buru lokpoma shihuru anyi ike; anyi dobe obu l'iphe ono, anyi ele enya iya ono.

Chileke e-me ge ndu nkiya tuta unme

⁷Unme-du-Nso pfukwaru su:

“Teke unu numaru olu
iya ntanu-a;

⁸ unu ta akpo-chikwa
obu unu
ge ndiche unu phe shi
kpo-chia ya
teke ono phe kwefuru
iya ike lechiegu;
teke ono,
phe shi anoduje ahù
mu ama onoya.

⁹ O buru l'eka ono be
ndiche unu phe
noru hua mu ama;

bya adalekwaa mu
 phọ adale;
 l'ẹka ẹphe
 hụmakwaru-a iphe,
 mu meru l'ime
 ụkporo apha labọ.

10 Ọ bụru iphe ono meru
 g'o gude ọgbo teke
 ono mee ẹhu ghua
 mu eghu mu sụ:
 'Ndu-a bẹ egomunggo phe
 jephuhuakwaru
 ejephuhu;
 ọphu ẹphe amadụ iphe,
 mu sụru g'e meje.'

11 Ọ bụru iya bụ l'ẹphe
 akpatsu oke-ẹhu-eghu mu;
 mu ria angụ sụ: 'Ẹphe
 ta abyadụ anọdu
 l'ọkpoku mu.'^e

12 Ọo ya bụ; ụnwunna mu; unu kwabekwaru onwunu ẹnya g'ọ tọ dọ onye ejo ọkpoma a-dụ l'echilabọ unu; ọphu ọ dọ onye a-buru onye te ekwetajedu iphe, Chileke epfu; shi nno haa etsoru Chileke ono, bụ ọphu dzụ ndzụ ono. 13 Ọ chia iphe, unu a-nọdu eme bụ g'unu pfushijeru nwibe unu opfu ike mbọku-mbọku, a gbeshikpowaru kua "Ntanua" g'ẹphe haa iphe-ẹji g'ọ tọ dọ onye iphe-ẹji e-dephu. 14 L'anyi tükokwaru bụru ndu ẹphe lẹ Kéreshi tükoru gbarụ mgba l'iphe nkiya mẹ ọ -buru l'anyi pfụ-shi-kpọerupho ike l'iphe ono, anyi shi lẹ mbụ dobe ọkpoma ono jasụ l'ikpazụ.

15 Eshinu e deru sụ:

"Teke unu nūmaru olu
 Chileke ntanụ ọwa;
 unu ta akpọ-chikwa
 obu unu
 gẹ ndiche unu phe
 shi kpọ-chia ya
 teke ono,
 ẹphe kwefuru iya
 ike ono.^f"

16 ?Bụ ndu ole bẹ nūmabebecharu olu Chileke ono bya ekwefukwaru iya phọ ike? ?Tọ buedu ndu ono, Mosisu dufutaru l'alị Ijiputu onoya?

e 3:11 Gūnaa Ebvụ 95:7-11. f 3:15 Gūnaa Ebvụ 95:7.

17?Bụ ndu ole bẹ kpatsukpøerupho Chileke ẹhu ẹghu ụkpоро apha labo? ?Tòbudu ndu meru iphe-ẹji; e mechaa odzu phez dakaa l'echięgu? 18?Bụ ndu ole bẹ o riru angu sù l'ẹphe ta abyadu anodu l'okpoku iya-a? Tòbudu ndu ono, ekwedu eme iphe, o pfuru onoya. 19O n'ia bu l'anyi humawaru l'o to kwedu g'ẹphe ndu l'okpoku iya kele ẹphe te ekwedu mee g'o pfuru.

4 1Oo ya bu ẹ-a; l'eshinu Chileke kwewaru anyi ukwe-iphe l'anyi abata l'okpoku iya; ge ndzu guje anyi g'anyi kwabe ẹnya g'o to du onye aa-sù l'o metaru iphe, e-me g'o to rwu ẹka ono. 2Kele o kwapho ge ndiche ono, Mòsisu edu ụzo l'echięgu ono nùmaru ozi-oma ono bu g'anyi-bedua nùmaru iya nta-a. Obenu l'opfu ono, ẹphe nùmaru onoya ta adudu urwu, o baru phe; kele ẹphe nùmachaarù ukwe-iphe, Chileke kweru bya emee g'ẹphe ta anumaduru iya. 3Lọ bukwapho anyibe ndu nùmaru ozi Chileke ono -kweta; anyi anodu l'okpoku iya. L'o pfuakwaru sù:

“Epe kpatsuru
oke-ẹhu-ẹghu mu;
mu ria angu sù:
‘Epe ta abyadu anodu
l'okpoku mu.’”

O pfua ya ẹgube ono l'eka ozi iya gbekwa bvuhawaro e -shi teke o meru mgboko. 4Lọ dukwaru ẹka e deru pfukuta mboku k'esa sù: “O be ẹ mboku k'esa; Chileke tuta unme iphemiphe, o meru.” 5Ole o pfukwarupho l'eka lanu ono sù: “Epe ta abyadu abata l'okpoku mu.” 6Sù-a; o dukwarua ndu a-ndu iya nu; obenu ẹ ndu ono, vuru ụzo numa ozi-oma ono ta abahuduru l'eka ono; kele ẹphe kwefuru ike. 7Noo g'o gude Chileke gbeshikwa bya eworu mboku ozo dobe, bu iya bu “Ntanu-a.” A bya anokpoakwaro odu shii g'abahù ono rwuhuchaaru; teme Chileke shi l'onu onye eze phe teke k'ichee, bu Dévidi pfua opfu iya l'eka ono, e pfuhawaru l'o sùru:

“Teke unu nùmaru olu
iya ntanu-a;
unu ta akpo-chikwa
obu unu.”^h

8Kele ome Jioshuwa meru ẹphe tuta unme obu; me e tege epfuhakwa k'edobe mboku ozo. 9Oo ya bu ẹ teke ndu ke Chileke a-tuta unme obu abyakwadu abyabya. 10Onyemonye, ye Chileke no atuta unme be ta aduedu ozi, oojekwadu; ẹgube ono, Chileke eje ozi nkiya ono. 11Oo ya bu; g'anyi kukebe ẹhu ndu l'okpoku iya ono; a -nonya o duru onye ekwefu ike g'ephebedua.

12L'opfu Chileke dzukwa ndzu bya ere ire. O kakwa ogu-echi, atsu akpatiphu labo atsu nko; k'ophu oosujaje nemadzu su-rwua mgbaka okpu

yee ume iya; mbu su-rwuchaa aka obu nemadzu no; uche iya nodu iya. Qovofutajehaa iphe, nemadzu ari mepoo ge nemadzu gbaru l'ime obu iya. ¹³Ophu o dudu iphe, no le mgboko, duru ophu Chileke ahumaduru. Iphemiphe, no le mgboko gbakota oto dabyiru l'ebederebadara l'iphu Chileke. O buru Chileke ono bu onye anyi pfufutaje l'iphu iya kokota iphe, anyi meru.

Jizosu bu Okalibe ishi uke Chileke

¹⁴Noo ya bu; unu g'anyi kwata gudesia iphe ono, anyi suru lo bu okpobe-opfu ono ike; kele anyi nweru Okalibe ishi uke Chileke; onye tukoru igwe l'ophu ghakota je anoduro l'imigwe aka Chileke lonwiya no. Onye ono bu Jizosu, Nwa ke Chileke. ¹⁵Okalibe ishi uke Chileke ono, anyi nweru onoya ta abukwa egube onye ata amajeduru aka anyi du arwuhu.

Onye anyi nweru bukwa onye ohtama, du iche iche byapfutawaru go byapfutaje anyi ono; ophu o meduru iphe-eji. ¹⁶Oo ya bu; g'obu shihu anyi ike g'anyi jerwua aba-eze eze-iphe-oma ono; k'ophu a-phuru anyi obu-imemini; leemeeru anyi eze-iphe-oma yejeru anyi aka le mkpa.

5 ¹Liphe, bukpo onye-ishi uke Chileke g'ephe hakpo be bukwa ndiphe edzukobeje shi l'echilabo phe hota iya woru iya mee onye a-no-chijeru oha l'iphu Chileke; nuje Chileke iphe, ndiphe nuru iya; gwejekwarupho Chileke ngweja k'iphe-eji phe. ²Yebedua ejije obu oyi; etso ndu eshiswe uzo; opfu l'ephe bu ndu amadu iphe; eshinu yebedua lonwiya bukwapo onye ahajekwarupho du arwuhu. ³Eshi ophu yebedua bukwapo onye emesweje nu be o gwefutajenurupho Chileke ngweja k'iphe-eji ophu yebedua lonwiya meru; yele ophu oha meru. ⁴Iphe ozo bu; lo to dukwa onye agbeshije hota onwiya kwabe ubvu-a. Oo onye Chileke lonwiya hotaru abujeru iya, bu iya bu go hotaru Eronu le teke ndiche.

⁵Nokwapo go to budu Kereshi gbeshierupho; kwabe onwiya ubvu k'eme onwiya onye-ishi uke Chileke. O Chileke be suru iya:

“Oo ngu bu Nwa mu
nwoke.

E -shi ntanu-a be mu
bukwaa Nna ngu.”ⁱ

⁶O byakwa epfu-a l'eka ozo su:

“I bu onye uke Chileke
jasu le tuutuutuu
le mijimiimii;
ge Melikizedeku bu iya.”^j

ⁱ 5:5 Guna Ebvu 2:7. ^j 5:6 Guna Ebvu 110:4.

⁷Teke Jizọsu bu l'eliphe ọwanawa bẹ o shi anọduje akwa ẹkwa akwa-shi ẹnya-mini g'ọo-dzọta iya g'ọ tọ nwuhu. O pfua nno; Chileke numa olu iya; eshi ọphu ọ bu onye ewodajẹ onwiya alị kwabẹ Chileke ùbvù. ⁸Su-a; a makwaru-a l'ọ bu Nwa kẹ Chileke; ọle ọo iphe-ẹhuka, o jekotaru bẹ o gude nwuta iphe, eme iphe, Chileke sọru g'e meje bu. ⁹Ọ buru g'ọ tukoadaru gẹ Chileke tumberu meebeke bẹ ọ byaru aburu onye adzotaje iphe, bu ndu eme iphe, o pfuru; dobe jasụ l'ojejoje. ¹⁰Ọ buru Chileke kuru iya mee ya onye-ishi-uke jasụ lẹ tuutuutu lẹ mimiimii gẹ Melikizedeku bu iya.

Anma ọkwa g'a ta ala azu

¹¹Ọ duru igwerigwe iphe, anyi gege epfu phota iphe ọwanawa; ọle ọotsu l'ehu g'ee-shi kooru iya unu; kele iphe te edojeedu unu ẹnya ẹgwewa. ¹²Ọle e -pfujekpoo ya epfufu nta-a bẹ ọ gbaakwaru g'unu gege abuwaru ndu ezi ndu ọzo iphe; obenu l'unu gbẹ bya aburu ndu gbaru g'aa-nodu ezi unu iphe, gbaru g'unu vuru ọzo maru iya l'opfu Chileke. Unu bya aburu ndu angukwadu era; l'unubẹ ndu gege anodu eriwa nri. ¹³Onye angukwadu era bu nwaswa bẹ ọ bu. Opfu k'apfubekoto teke edodu iya ẹnya. ¹⁴Obenu lẹ nri bu kẹ ndu buwaa ọgerenya; ndu a zuwaru azuzu ephe mawaru iphe k'ọphu bu: ephe -lee iphe ẹnya; ephe a-makaharu ?ọ du ree tọ ọ du eji.

6 ¹Eshinu ọ du ẹgube ono; unu g'anyi tuko gwobe iphe ono, gbaru g'anyi vuru ọzo maru iya l'ozu ono, e ziru anyi lẹ kẹ Kéreshi ono; yeru ẹhu l'anwu iphe, e-me g'anyi buru ndu karu ẹnya l'ozu ono. G'anyi ta abyashi agaru k'egbube ishi ezi ndu k'ono ọzo; lẹ ndu k'ono bẹ unu mahawaru. G'anyi wofu obu l'ari l'oo iphe-oma, anyi metaru bẹ Chileke e-gude dzoo anyi, mẹ l'ekweta kẹ Chileke; ²mẹ lẹ k'eme baputizimu; mẹ abyabẹ nemadzụ ẹka l'ishi; mẹ k'eshi l'onwu teta; mẹ k'ikpe ojejoje ono. ³Ono bẹ anyi e-me-a mẹ Chileke -kwe.

⁴Kele ọotsukwa l'ehu g'izimanu e-shi lwaphuta phe azu; mbu ndu iphe, shi dowaa ẹnya; iphe-oma, shi l'imigwe ono shi ruwaa phe ẹka; teme ephe shi anatajewaa Unme-du-Nso; ⁵ephe shi anumajewaa ọkpobe-Opfu Chileke ono; mawaru k'ike, du l'ogbo ọphu abyanu; ⁶mbu ndu tukoru iphemiphe ono, makotaru bya agbakuta iya azu; lekebe ẹnya akpopyabe Nwa Chileke loswebe ọzo; eme iya iphe-iphere l'edzudzu-oha.

⁷Su-a; l'alị, echeje mini, igwe edzejeru iya tekenteke; bya egudeje iya eme g'iphe, a kuru iya baaru ndu kuru iya nu l'urwu bẹ Chileke a-gokwaru onu-oma nu. ⁸Obenu l'alị ọphu buepho ewu-óbvú yee ogarambo bẹ efu iya nu bu mkpokoro alị. Alị k'ono phoduru nwanshii; Chileke atua ya onu. Ee-mechaa; ọoburu oku, e-tsufu iya.

⁹Ọle-a; ndu mu yeru obu; anyi epfukwaa ẹgube-a bukwa eviya; ọle anyi makwaru-a ree l'unu e-tsoru-a ọzo ọphu ka ree, e-me gẹ Chileke

dzota unu. ¹⁰Le Chileke ta adukwa onye oomeje iphe, apfuduru-oto. O too zohakwa ozi, unu jeru; ophu oo-zohakwa g'unu gude yehawaru unwunna eka me ophu unu eyekwapho nta. Iphe ono tukoru egoshi l'unu yeru iya obu. ¹¹Iphe, agu anyi bu g'onnyemonye le g'unu ha meje goshi ge ke Chileke aphu-beru iya lehū; meje iya egube ono jasū l'ikpazu g'iphe, unu ele enya iya erwua unu eka. ¹²Iphe, anyi ese iswi iya bukwa g'unu ta aburu ndu enyiru. G'unu nwuchia eka ndu ono, gude ekweta, epe kwetarū opfu Chileke me ata nshi, epe ata gude anata iphe ono, Chileke kwegbaarū ukwe iya ono.

Aburu eviya k'ukwe-iphe Chileke

¹³Su-a; teke ono, Chileke kweru Ebirihamu ukwe-iphe onoya be bukwa onwiya be o gude riaru iya angu iya; eshinu o to duedu onye ozo, kabaa ya shii k'egude ria angu obu. ¹⁴Tobudu iya bu; o su: "Mu gofutajeru ngu onu-oma; mee g'unwu ngu kwata du igwerigwe." ¹⁵Ebirihamu mechaa taa nshi; jasū iphe-oma ono, rwu iya eka. ¹⁶Onye eri angu bu epha onye ka iya shii be oogudeje ria ya; teme o nodu abujeru: a -gūwaru enwa ye l'iphe, aatu ego; k'igoligoli alaa. ¹⁷Kele Chileke eme g'o doo phe enya; mbu ndu ono, a-nata iphe ono, o kweru ukwe iya onoya; le ya ta ayidu gbanwee iphe, ya kweru ukwe ememe; o riru angu ye iya. ¹⁸Su-a; Chileke kweru anyi ukwe-iphe; teme o bya eriru angu ye iya. Uzo iphe labo ono buchaa iphe, ta agbanwedu agbanwe; teme o bukwarupho iphe, Chileke ta ayidu dzuru uka ye. Oo ya bu g'obu eshihu anyi ike; anyibe ndu gba-pfuru iya nu g'o dzoo anyi; g'anyi te eje abo obu ebo k'a maru: ?oo-nua anyi iphe ono, anyi ele enya iya ono. ¹⁹Iphe ono, anyi ele enya iya ono emeje g'obu bvuru anyi ebvuru. Oosededeje anyi obu l'eka lanu mee ya g'o nguru anguru. O mewaru anyi bahu l'ime ime eze-ulo Chileke, bu iya bu eka Chileke lonwiya no l'imigwe. ²⁰Oo Jizosu bu onye vuru uzo bahuchiru anyi l'eka ono; kele oo ya buwaa onye-ishi uke Chileke. O buru iphe, oo-buru bu ono jeye le tuutuutuu le mimiimii, bu iya bu ge Melikizedeku bu.

Melikizedeku shi buru eze bya aburu uke Chileke

7 ¹Melikizedeku ono, anyi epfuru ono shi buru eze ndu Salemu teke k'ichee; bya aburu onye uke Chileke; mbu Chileke, bu Okalibe-kangokotaru-nu. O gbaru Ebirihamu ndzuta teke o shi ugu, epe gbushiru ndu eze alwa; bya agoru onu-oma nu iya. ²Ebirihamu bya eworu iphemiphe, o lwutaru l'ogu; kee uzo iri; nu iya uzo lanu. A -kukahakpo epha Melikizedeku be iphe mbu, o bu bu: "Onye eze, pfuberekoto." Epha iya bufukwaapho Onye eze, shi le Salemu, bu iya bu Onye eze ke nchi-odoo. ³Melikizedeku te enwedu ne; ophu o nwedu nna; ophu o nwedu okpa-ipfu, o shi; ophu o nwedu teke o shi; ophu o nwedu teke o no-beru.

Oo ya bu l'ò dūwaa gẹ Nwa Chileke; opfu l'ò būwaa onye uke Chileke jasū lẹ tuutuutu lẹ m̄imiimii.

⁴Sū-a; ?unu hūmaru gẹ Melikizedeku ono bū-be oke nemadzū; ọ gbẹ būchiaru yēbedua bẹ Ébirihamu ono, būkpooyā bū onye-iche anyi ono gbẹ kee iphe, ọ kwatarū l'ògu ẹzo iri; woru uzi lanū woru nū iya. ⁵Ọ kwa ndu-uke Chileke, shi l'awa Lívayí kpū bẹ ekemu Mósísu sūru gẹ ndu Ízuru lẹ keje iphe phẹ ẹzo iri woru uzi lanū nūjẹ phẹ. Ọ buri phẹ bẹ ekemu sūru g'ẹphẹ natajẹ unwune phẹ iphe ono; mbū ẹka ephẹ l'ẹphẹ gbẹkwa tūkokwaa buri unwu Ébirihamu. ⁶Obenu lẹ Melikizedeku ta abudu oshilokpa Lívayí. Ébirihamu ono gbẹ wolẹru-a iphe, o nweru kee ẹzo iri; woru uzi lanū nū iya. Melikizedeku bya agorū onu-oma nū Ébirihamu ono, Chileke kweshiru ukwe-iphe ono. ⁷A ta tudu iya ẹgo k'amaru: ?onye agọ onu-oma bẹ ka onye ọgoru iya shii tọ. ⁸A bya l'ẹhu ndu-uke Chileke ono, shi l'awa Lívayí ono; ọ buri ndu e-mechaa nwūhu anwūhu bẹ anatajẹ oke-lanū-l'ẹzo-iri ono. Teke a byakwanuru l'ẹhu kẹ Melikizedeku; ọ buri onye ẹkwo-opfu Chileke pfuwaru l'ò tọo nwūhudu anwūhu bẹ natarū iya nū. ⁹Mu -jeshia ya epfufu mu asū lẹ Lívayí kwapho, aapfujeru oke-lanū-l'ẹzo-iri nū ono bẹ gbewaa l'ime Ébirihamu pfukwapho oke-lanū-l'ẹzo-iri nkiya. ¹⁰Noo kẹle ọ nōwaa l'ime ẹhu ndiche iya phẹ teke ono, ephẹ lẹ Melikizedeku dzudarū ono.

¹¹Ọ -buri l'adubebe ree shi l'ẹka ndu-uke kẹ ndu Lívayí; g'ò bū iya bẹ a gbaberu okpa nū ndiphe ekemu-a; ?buhunu gunu meru g'o gude mkpa onye-ishi uke ọzo dukwadu, bū onye ophu a-dū gẹ Melikizedeku, abudu onye ophu dū gẹ Eronu? ¹²Ọle teke Chileke gbanwewaru uke iya bya anaa uke ọzo, yele ophunapho agbaedu; ọo ya bū l'ò gbanwefutaje ekemu pho, ọ tūhawaru pho. ¹³Kẹle onye eepfu opfu iya-a bukpokwaro onye okpa-ipfu ọzo; ophu ọ dudu onye ipfu phẹ, jejeru ozi uke l'iphu ọru-ngweja Chileke. ¹⁴A makahakwaru lẹ Nnajiuphu anyi shi l'okpa-ipfu Jiuda. Ophu ọ dudu teke Mósísu photajeru Jiuda teke o pfuru opfu kẹ ndu-uke Chileke.

Onye uke ọzo, dū gẹ Melikizedeku

¹⁵Mbū l'iphe, anyi epfu kabakwaa edo ẹnya; mẹ ọ -buri l'onye-ishi uke ọzo, dū gẹ Melikizedeku futaru. ¹⁶Abū uke nkiya ta abuekwa nsọ nsọ mẹ ekemu ekemu, nemadzū tūshiru dobe bẹ o gude buri iya. Ọ kwa ike kẹ ndzū ojejoje ophu ọ dzū bẹ o gude buri onye uke Chileke. ¹⁷Le dekwaru sū: “Íi-buru onye uke Chileke jasū lẹ tuutuutu lẹ m̄imiimii, bū iya bū gẹ Melikizedeku bū iya.” ¹⁸Kẹle ekemu pho, Chileke tūhawarupho bẹ Chileke nwuchiakwaru; kẹle o too redu ire; tẹme ọ buri mkpokoro iphe. ¹⁹Iphe, o gude ọ dū ẹgube ono bū l'ekemu Mósísu ono ta adudu onye ọ duru ike mee g'ò dubebe ree l'iphu Chileke. Nta-a bẹ anyi elewaa ẹnya iphe, ka ree. Ọ buri iphe ono, ka ree ono, anyi ele ẹnya iya ono bẹ anyi shiwaa akpo-kube Chileke ntse.

²⁰Ọzo bụ ị Chileke riru angụ ye l'aburu onye uke nkiya. Ndu uke k'ophunapho bę e te riduru angụ ye ị nkephe. ²¹Obenu ị Jizọsu bę Chileke meru onye uke bya eria angụ ye iya teke ono, ọ sụru:

“Nnajiuphu ribuwaru angụ;
 ọphu ọ gbanweedu iphe,
 ọ tųberu ememe.
 Ịi-buru onye uke
 Chileke jasụ l'ojejoje.”^k

²²Ọ buru angụ ono, Chileke riru ono meru Jizọsu ọ buru onye Chileke gude egoshi l'ogbandzu ọwa-a, ya riru angụ ye-a ka akahụ iya ree.

²³Iphe ọzo bụ ị ndu-uke Chileke k'ono dų igwerigwe kele anwuhu te ekwejedu g'ephe nọpyabe iya. ²⁴Obenu ị Jizọsu buepho uke, ọ bụ; bųshia ya ike; opfu ị yebedua a-nọ je aduwaruroya. ²⁵Ọ buru iphe ono meru g'o gude ọ nọdu aduje ike dzọo ndu gbę iya l'eka lwapfuta Chileke; dzọo phe ọkpobe adzọdzo; noo kele yebedua dzuwaa ndzų ojejoje epfuje anų Chileke l'iswi ehu phe.

²⁶Ọ buru egube onye-ishi-uke ono bę mkpa iya duru anyi; onye dų nsọ ọphu ọ dudu iphe-eji, o mejeru. Chileke hofuru iya iche l'echilabọ ndu iphe-eji bya ewolia ya doghakota iphe, bukpo eligwe l'ophu. ²⁷Ndu-ishi uke Chileke ophu, shi l'okpa-ipfu lıvayi phọ shi anọduje egwe ngweja mbọku-mbọku. Ephe shi anọduje egwe ngweja ono k'iphe-eji phe bya egwedokwaru iya phọ ọha l'ophu. Obenu ị Jizọsu bę ọ tọ gbaduru g'o gwee nkiya g'ephebedua. O gweru nkiya ngwe lanu sefu eka. Ngwe lanu ono bų ọphu o gude onwiya gwee. ²⁸Kele ekemu Mosisu bukwa nemadzų mmanų bę ọ sụru g'ephe buru ishi uke Chileke; mbų nemadzų mmanų, ahajeru meswee nų. Obenu ị g'a nọnyaaru Chileke bya eria angụ phọ shi egube ono nwuchi ekemu ono bę ọ hotaru Nwa Chileke mee ya onye-ishi uke iya. Yebedua, bų Nwa Chileke ono bę meebewaru iphemiphe ị ke ge ndiphe e-meje bata l'eka Chileke nọ; ge Chileke tųberu iya. Iphe ono bę o meebewaru g'oo-dų jasụ ị tuutuutu ị mimiimii.

Jizọsu onye-ishi uke k'ogbandzu ọphuu

8 ¹Waa iphe, bukpo ishi iphemiphe ono, anyi epfu ono bų ọwanawa: anyi nweru egube onye-ishi uke Chileke ono; onye ọphu nọ anọ l'imigwe l'ekutara aba-eze Okalibe-kangokotaru-nų. ²Yebedua eje ozi uke nkiya l'eka Chileke nọ gedegede, bų iya bų l'eze-ulo Chileke ọphu nọ l'imigwe. Ulo k'ono ta abudu nemadzų gude eka mee ya. Ọ buru Chileke lonwiya meru iya.

³Liphe, Chileke hota-doru iphe, bukpo ndu-ishi uke iya bukwa g'ephe nuje iya iphe, ndiphe nuru iya; waa g'ephe gwejekwaru iya phọ ngweja.

^k 7:21 Guna Ebv 110:4.

Ọo ya b̄nu l'ọ gbaru g'onye-ishi uke ọwa-a nweru ngweja, ọo-nọdu egwe. ⁴Su-a; ọme Kéreshi ono nọ l'eliphe-a m̄e e te ekwekpọkwanu g'ọ b̄ru onye uke Chileke; eshinu ndu b̄u uke Chileke k̄e mgboko-a egwejeru Chileke ngweja l̄e g'a t̄uru iya l'ekemu ndu Jiu. ⁵Iphe, ẹphe emeje l'ẹka eegwejeru Chileke ngweja l̄e mgboko-a b̄ukwa iphe yeru ọphu onye-ishi uke k'anyi ono eme l'imigwe; k̄e mgboko-a b̄ukwa onyonyo nkiya l'imigwe. L̄e teke M̄osisu eme g'ọ kp̄obe ọlo-ẹkwa, eegwejeru Chileke ngweja ono l̄e teke ndiche b̄e Chileke s̄ukwaru iya: “Nyatakwa g'i mek̄otakp̄oeph̄o ọlo ọbu g'ọ d̄ueph̄o ḡe ya t̄uru ngu ọnu iya l'eli úbvú ph̄o.” ⁶Obenu l̄e ḡe ọ d̄u nta-a b̄e Chileke ziwaru Jiz̄osu eje ozi uke iya; mb̄u ozi ọphu ọkwa iya kwata ka shii; eme l̄e k̄e ndu-uke k'ọphunapho. Nokwaph̄o g'ọgbandzu ọphu shi iya l'ẹka o gude gudegbab̄e Chileke ȳele nema-dz̄u kwata ka akah̄u iya ree; eshinu o shi l'ọgbandzu k'ọwa-a; kwee anyi ukwe-iphe, ka ree; eme l'ọphu o shi l'ọphunapho kwee.

⁷L̄e-a; ọ -b̄u l'ọta ta ad̄u l'ọgbandzu k̄e mb̄u m'o to jekwa iya enwuchi k'agba ndz̄u ọzo. ⁸Obenu l̄e Chileke tar̄u ndu nkiya ọta teke ndiche. Ọ s̄uru ph̄e:

“Mb̄oku abyakwa;
nokwa iphe, Chipfu eefu;
teke mu l'ọnu-ọlo Ízurelu
waa ọnu-ọlo Jiuda a-gba
ndz̄u ọph̄úú.

⁹Ono taa d̄uedu g'ọgbandzu
ọphu mu l̄e ndiche ph̄e
gbaru teke ono,
mu kp̄utaru ph̄e
l'ẹka kp̄ufuta l'al̄i
Ijiputu ono.

L'e mechakwaaru;
ẹphe mebyia
ọgbandzu mu l'ẹphe;
ọphu mu
eyebāeduru ph̄e ọnu.
Nokwa iphe, Chipfu
eefu.

¹⁰Chipfu s̄ukwapho:
Ọwa-a b̄u ọgbandzu
mu l'unwu Ízurelu
a-gba m̄e o -rwueph̄o
teke ono.
Ekemu mu b̄e mu
a-t̄ushi ye ph̄e

- l'egomunggo.
 O b̄uru l'ime ɔkpoma
 p̄he b̄e mu e-de
 iya edede.
 Mu ab̄uru Chileke p̄he;
 ɛp̄he ab̄uru ndibe mu.
- 11 O t̄o d̄uedu onye
 ejekwadu ezi nwibe iya;
 ɔzoo ziahaa nwune
 iya s̄u iya:
 'Maru Chipfu'.
 Noo l̄e g'ɛp̄he ha a-t̄uko
 maru mu;
 nwata m̄e ɔgerenya.
- 12 Mu a-ph̄uru p̄he
 obu-imemini l'emeswe,
 ɛp̄he mesweshiru mu.
 Ophu mu anyatabaɛdu
 ip̄he-ɛji,
 ɛp̄he meshiru mu."¹

13 S̄u-a; eshinu ɔgbandzu-òphúú-a byaru b̄e k̄e mb̄u ph̄o b̄uakwa akah̄u-
 ip̄he. T̄eme ip̄he, b̄ukpoo ip̄he, akah̄uwaa akah̄u bya atsuh̄uwaa m̄e ta
 ad̄udu g'òono-beru; l'oo-ch̄ihu.

Abar̄u Chileke ɛja l'uzo k'akah̄u m̄e k'òphúú

9 ¹S̄u-a; ɔgbandzu mb̄u ono nwekp̄okwaaru ns̄o ns̄o, a t̄uru g'e dobeje m̄e
 a -n̄odu abar̄u Chileke ɛja bya enwekwarup̄ho ɔlo, nemad̄zu gude ɛka
 mee, aan̄oduje m̄e a -n̄odu egwekwaru iya ph̄o ngweja. ²K̄ele a kp̄oberu eze
 ɔlo-ɛkwa. Lime mkpuru iya k̄e mb̄u b̄e e doberu or̄oku; waa teburu, aatuko-
 beje buredi, d̄uru Chileke ic̄he. Mkpuru k̄e mb̄u ono aza ɛka-d̄u-ns̄o. ³A bya l̄e
 mkpuru k'ɛbo eku ɛka-kak̄ota-ad̄u-ns̄o b̄u ɛkwa b̄e e gude gebuta iya. ⁴Ip̄he,
 d̄u iya n̄u b̄uru ɔru-ngweja, e meru l̄e mkp̄ola-ododo g'akpoje ùnw̄u-is̄ensu
 ɔku; waa okpoko ɔgbandzu, e gude mkp̄ola-ododo kwek̄ota mgburugburu.
 Ip̄he n̄ogbaa l'ime okpoko ono b̄u ite, a w̄uru l̄e mkp̄ola-ododo. Ip̄he, n̄o l'ime
 ite ono b̄uru nri ono, b̄u mana; ȳe mgb̄oro Er̄onu; mb̄u mgb̄oro ono, rwuru
 irwu t̄ua ige ono; waa mkpuma lab̄o ono, e deru ekemu iri ono, b̄u mkpuma
 ɔgbandzu onoya. ⁵Ip̄he, d̄u l'eli okpoko ono b̄uru ojozi-imigwe lab̄o, b̄u Chie-
 robimu, egoshi ɔdu-biribiri Chileke. ɛp̄he woru ñk̄u p̄he sash̄ija gude gbobuta
 ɛka ono, Chileke aph̄ujeru ndu nkiya obu-imemini; guaru p̄he nv̄u l'ip̄he-ɛji,
 ɛp̄he meru ono. O gbabeɛpho b̄e e-pfubaa ono t̄ua ya jalaa.

¹ 8:8-12 Ḡunaa Jier 31:31-34.

⁶Ọ buru ẹka ono, e meru egube ono be ndu-uke Chileke abahuje l'ime mkpuru ke mbu onoya mboku-mboku je eje ozi uke, gbaru phe nu. ⁷A bya le mkpuru k'ebo pho; o buerupho onye-ishi uke Chileke kpekpu l'abahuje iya. Abahu ono, obahuje iya ono bukwa mgbo lanu kpoloko l'apha. Ebe o yikwa bahu iya me o -gudedu mee-iphe, oo-gude gwee ngweja ehu onwiya yelee mee-iphe, ophu oo-gude gwefu iphe-eji ndu ke Chileke meru lebe ama ono. ⁸Waa iphe, Unme-du-Nso gude iphe ono eme g'o doo anyi enya bu owanawa. Le teke ono, eka ono, nemadzu gude eka mee ono, eegwejeru Chileke ngweja ono nokwadu be e teke aguhadu uzo, e shi abahu leka Chileke no g'oniyemanye bahu. ⁹Eka ono, eegwejeru Chileke ngweja ono nokwa onodu etu, egoshi iphe, eme nta-a, bu iya bu l'iphemiphe, a nuru Chileke me iphe, bu ngweja, e gweru nu iya leka ono ta ayidu mee g'obu onye abaru Chileke eja nmabuhu iya ikpe. ¹⁰O tukoru buru nso nso, eemegbaa ala le ke nri; me k'iphe, aangu angungu; mekpoo ke nso nso, du lasashi iphe, e gudegbaa mee k'abaru eja ono. O tukoru buerupho nso nso ke mgboko-a, Chileke suru g'e tsoje jasu teke ya e-goshi uzo ophuu, ee-shije abaru iya eja.

¹¹Obenu le nta-a be Kereshi byawaru bya aburu onye-ishi uke Chileke; mbu onye-ishi uke k'uzo ono, ka ree ono, Chileke goshiwaru nta-a ono. Eka o jeru ozi uke iya kakwa shii bya abukwarupho eka Chileke ka egude mee g'iphe, ya tuberu le k'adzota ndiphe ono meebekota ge ya tuberu iya. Eka ono ta nodu le mgboko owa; eshinu o to budu eka nemadzu gude eka mee. ¹²O to bukwa mee egbu ozoo mee eswi be o gude bahu; oo mee nkiya gedegede be o gude bahu leka ono du nso ono ugbo lanu; k'opu anyi a-buru ndu a gbataru litumo jasu lojejeje. ¹³Le mbu be oobujeru e wotawaa mee egbu; ozoo mee eswi; ozoo ntutu nwada eswi, a kporu oku woru phee ndu turwuru nso; lo mee ndu obu ephe adubebe ree le ge nso ekemu phe gude du. ¹⁴Eshinu o du nno eviya be mee ke Kereshi l'a-kabakwanu ere ire. Kereshi ono shi leka Unme Chileke, ano je-aduwaruro ya woru onwiya gweeru Chileke ngweja, adudu eka ntutu du iya. Mee nkiya ono a-kabakwanu asafu obu anyi g'o du ree l'iphu Chileke; k'opu anyi a-hakwanu eme iphe, Chileke a-nma anyi ikpe onwu; letachia enya lozi Chileke, bu Chileke dzu ndu.

¹⁵O buru iphe ono meru g'o gude o buru Kereshi gudegbabe Chileke yelee nemadzu l'ogbandzu ophuu ono. Oo ya bu ge ndu Chileke hotaru eshikwanu leka Kereshi nodu ndu ophuu ono, Chileke kweru ukwe iya ono jaswaruro ya. Iphe, o gude ephe jee l'anodu ndu ono bu le Kereshi nwuhuwuru; gude nno gbata phe l'iphe-eji, ephe megbaberu teke ono, ogbandzu ke mbu pho, shi Chileke leka pho shi vukwaduru ire.

¹⁶Ukwe-iphe, Chileke kweru tukobe l'ogbandzu nkiya dukwa g'onye keru ekpe. L'obujekwaru; e -kee ekpe dobe be aavojeadakwaa ya g'a maru: ?onye keru ekpe obu nwuhuwuru; teme lo duru g'ee-me iphe iya

ọbu. ¹⁷Noo l'ekpe, nemadzū keru te evujeduru ire teke onye ono nọkwa-
du ndzū. Teke ooreje ire bụ mę onye ono nwuhuchaa. ¹⁸Noo g'o gude ọ
būru mee bę e gude mee ọgbandzu mbū phọ; o reahaa ire. ¹⁹Iphe mbū bụ
lę Mósisu pfuru ndu Ízurelu iphe, bụkotakpoo nsọ nsọ, dū l'ekemu ono-
ya g'ọ hakpọo. Ọ gbęshi ọzo bya ewota oshi isopu yele eji atūru, e meru
ọ nọdu eke uswe-uswe; woru tsee lę mee nweswi; waa mee egħu; bya
atsekwa ya phọ lę mini bya egude iya phedzuru l'ękwo, e deru ekemu
ono; bya ephedzukwaru iya phọ iphe, bụ ndu ono g'ęphe ha. ²⁰Ọ nọdu
ephe iya bya epfuje sū: “Ọwa-a bụ mee, egoshi l'ọgbandzu unu lę Chileke
gbaru vuwaa ire; mbū ọgbandzu ono, o shi goshi unu iphe, unu e-me gę
yebedua emekwanaa iphe, ya pfuru unu.” ²¹Nokwaphọ g'o woru mee ono
phedzuru ọlo ono, e gude ękwa mee ono; mbū ọlo ono, aanọduje gweeru
Chileke ngweja onoya; bya ephedzukwaru iya phọ l'iphe, bụkpoo iphe, e
gude abarū iya ęja. ²²Mbū-a; e -tsojekpọo ya g'ekemu dū; l'ọ būru nwa-
nshii mę iphemiphe abụkotaru mee bę eegudeje mee ya g'ọ safu dū ree.
Tęme ọphu aa-gbatadu nemadzū abūdu l'ọ dūru iphe, e gburu gbashi mee
ya.

Ęja Kęreshi egwefu iphe-ęji

²³Ọ bụ iphe, gbaru l'ememe lę teke ono; g'e shi lę nsọ nsọ gbashia-
da mee ono; mee g'iphemiphe ono, tūkoru būru iphe, yeru k'ọkpobe iya
ọphu dū l'imigwe ono; g'iphemiphe ono tūko būru iphe, safuru dū ree.
Ọle ọkpobe iphe ono, dū l'imigwe ono bụ iphe, gbaru iya nū bụ ngweja
ọphu tūkoru kakọta ọphu eegbuje anū gude gwee ree. ²⁴Lęka Kęreshi ba-
huru ta abụkwa ęka eegwejeru Chileke ngweja ọphu bụ nemadzū gude
ęka mee ya; mbū ęka yeru ọphu bụ ọkpobe iya phọ. Ęka ọ bahuru bụ-
kwa l'imigwe gędegede, bụ iya bụ ęka ọ nọ l'iphu Chileke epfu opfu ęhu
anyi. ²⁵Onye-ishi uke kę ndu Jiu l'egudeje mee, abūdu kę yebe onye-ishi
uke ono bahū lę Ęka-kakọta-adū-nsọ ono aphagapha je egwee ęja. Obenu
lę Kęreshi bụ ugbo lanū kpoloko bę ọ bahuru lęka ono je egude onwiya
gwee ęja. ²⁶Odumeka bę Kęreshi e-je iphe-ęhuka k'o -jehaa oojebaa; eshi
teke Chileke meru mgboko. Obenu l'ọ byaru ejee iphe-ęhuka ono mgbo
lanū sefu ęka; gę mgboko abvūwa-a; gude onwiya gwee ęja nwūhu; shi
nno gwefu iphe-ęji, anyi meru g'ọ ha. ²⁷Iphe, dūru onyemonye bụ l'onye-
mony nwhufutaje akpọ lanū; ọ nwuhuchaa; iphe ọzo, e-mefūanu bụ lę
Chileke e-kpe iya ikpe. ²⁸Nokwaphọ gę Kęreshi gude onwiya gwee ęja
mgbo lanū kpūrumu nwūhu g'ooshi ęgube ono gwefu iphe-ęji, igwe ọha
meru. Oo-mechakwaa bya k'ugbo ębo; obenu l'ọ byaepho k'ugbo ębo bę ọ
tọ byadoeduru iphe-ęji. Iphe, ọobyawaa bụ g'ọ dzọta ndu echeru iya nū.

10 ¹Ekemu bükwa nwinyekinyeki onyonyo iphe, dū ree, Chileke
tūberu l'oo-me l'iphu; ọ tọ būdu ọkpobe iya. Ọ būru iphe ono me-
ru g'o gude ọphu ọ byadū eme gę ndu byaru abarū Chileke ęja dūbe ree;

eshinu aanɔduje egwe eja ono mkp̄urumkpuru; e -gwechaa egwebaa; aphagapha. ² Ọ -bụ lẹ ndu ono, agwajẹ Chileke ẹgube ono shiwaa l'egwe eja ono safu iphe-ẹji phẹ mgbo lanu; bụwaru ndu pf̄uberekoto l'iphu Chileke; mẹ obu phẹ anmabuhuhawaa phẹ ikpe iphe-ẹji phẹ; ephe ahaa egwe ngweja anu Chileke. ³ Obenu l'iphe, emeje nū bụ l'ọo eja ono, ẹphe anɔduje egwe ono emeje g'ẹphe nɔdu anyata iphe-ẹji phẹ aphagapha. ⁴ Lẹ mee eswi; mẹ k'eghu ta asukwa egwefu iphe-ẹji.

⁵ Ọ buri iphe ono meru g'o gude; teke Kéreshi abya mgboko ọ sụ Chileke:

“I ti ledu ẹnya g'e wota
iphe gbua gweeru
ngu eja;
ozoo g'e gweru
iphe-ngweja nū ngu.

Obenu l'i meru mu buri
nemadzu,
nweru anu-ẹhu.

⁶ Iphe ngweja,
akp̄okotaru ọku nū ngu;
mẹ ọphu e gweru
k'iphe-ẹji ta adukwa
ọphu jiru ngu ẹpho.

⁷ Noo ya bụ; mu sụ:
‘Waa mu Chileke;
mu byawaru gẹ mu
mee iphe,
dụ ngu l'uche;
gẹ mu mee g'e deru
kẹ nkemu l'ekwo
ekemu.’ ^m

⁸ Ovukp̄oadaru ọzo sụ: “Iphe, e gburu gweeru ngu ngweja; ọzo ngweja, e gweru nū ngu; ọzo iphe-ngweja, a kp̄okotaru ọku nū ngu; mẹ ọphu e gweru k'iphe-ẹji ta adudu ọphu iile ẹnya iya; ọphu ọ dudu ọphu jiru ngu ẹpho.” E -gudekp̄ooro l'iphe, bupoo ejameja ono bẹ eegwek̄otaepho g'a t̄uru iya l'ekemu. ⁹ O pfuchaa nno bya asụ: “Waa mu Chileke! Mu byawaru gẹ mu mee iphe, dụ ngu l'uche.” T̄obudu iya bụ; ọ bya eworu kẹ mbu pho docha k'ọphu oo-me k'ẹbo g'ọ nguru anguru. ¹⁰ Jizosu Kéreshi meru iphe, dụ Chileke l'uche teke o woru onwiya gweeru Chileke eja mgbo lanu sefu ẹka; shi nno mee anyi dụ nsọ. ¹¹ Iphe, bupoo onye uke Chileke apf̄u-geru eje ozi uke iya mboku-mboku; ọ buri egube eja, o gwewawaru bẹ

^m 10:7 Gūnaa Ebvū 40:6-8.

oogwephuje azu tekenteke; ophu egube eja ono ayidu du ike safu iphe-eji. 12 Obenu l'onye uke owa-a gweru ngweja k'iphe-eji mgbo lanu sefu eka; bya eje anodu l'ekutara Chileke. 13 O buru eka ono be oo-nodu jasu teke Chileke e-woru ndu ohogu iya mee g'ephe buru iphe, oo-zopyabe l'okpa. 14 Oo ya bu; o shi egube ono buru akpo ngweja lanu be o gweru gude mee ge ndu o safuru iphe-eji phe buru ndu pfuberekoto l'iphu Chileke jasu le tuutuutu le mijimiimi.

15 Le Unme-du-Nso goshikwarupho anyi l'iphe ono bu eviya; kele o vuchaaru uzo su:

16 “Owa-a bu oghandzu,
mu l'ephe a-gba me
mboku ono -rwepho.
Nokwa iphe, Chipfu eepfu.
Ekemu mu be mu a-tushi
ye phe l'obu;
mu edee ya edede
l'egomunggo phe.”

17 O gbeshikwa ozo su: “Mu ta anyatabaedu iphe-eji phe me ejo-ememe ephe eme ozobaa.” 18 Oo ya bu; le teke o bu le Chileke guwaru ndu nkiya nvu l'iphemiphe onoya; bunu iya bu le mkpa egwe ngweja ono k'egwefu iphe-eji ta aduedu.

Akpiritaru Chileke ntse

19 Nta-a; unwunna mu; be anyi ta atsuedu ebvu eshi le mee Jizosu ba-hu l'eka ono, Kakota-adu-nso ono. 20 Le Kereshi gudeakwa ogwehu iya guhaaru anyi uzo ophu; ophu anu ndu. O buru ogwehu iya ono no onodu g'ekwa ono, egbobutaje eka eeshije abahu l'Eka-kakota-adu-nso ono. Ekwawa ono mechaaru gbajahu ebo; shi egube ono egoshi l'anwuhu, Kereshi nwuhuru guhawaru anyi uzo ono g'anyi bahu l'eka ono. 21 Eshinu anyi nweru onye-ishi uke ke Chileke du egube ono; onye bu iya be ndu onu-ulo Chileke du l'eka; 22 bunu iya bu g'anyi gude obu anyi g'o ha; mbu obu, kwetashikpooru ike le Chileke a-nata anyi gude kpiritaru iya ntse. Le Jizosu gudeakwa mee ya phedzuru obu anyi; k'ophu bu l'o to dedu g'o ka mma l'oo nwantekuru iphe-eji, anmakwadu anyi ikpe l'obu. Anyi duakwapho ge ndu e gudewaa mini, doru edodo saa. 23 Unu g'anyi kwa-ta gudeshia iphe ono, anyi suru l'anyi ele enya iya ono ike; g'anyi ta tuhu mgbeleke ele enya iphe obu; kele Chileke yebedua, kweru anyi ukwe-iphe obu l'apfushijekwa ike l'iphe, o pfuru. 24 Unu g'anyi yejeru ehu l'iphe, aduru nwibe anyi le ree; k'ophu anyi e-meje ndu ozo g'ephe yeje nwibe phe obu; waa g'ephe meje iphe, du ree. 25 Unu g'anyi ta ahakwa edzukobeje

ⁿ 10:16 Guna Jier 31:33.

l'èka lanu ono, anyi edzukobeje ono; noo l'ò dukwaru ndu ophu watawaru agbala; o chia g'anyi meje g'okpoma shihu nwibe anyi ike; kelekele g'unu elenaa enya le teke obu duwaa ntse-a.

²⁶ Sù-a; anyi -gbè nta-a, anyi mawaru okpobe-opfu-a bya elekebe enya eme iphe-èji bè o tò dukwa ngweja, egwefukwadu iphe-èji anyi. ²⁷ O chia iphe lanu, du nu kpekpku bu ndzu-agugu k'iphe l'e-me nu, bu iya bu ndzu ikpe Chileke; kele oo èjo oku ono, abya igiri onoya bu oku ophu e-mebyishi iphe, bukpoò ndu kwefuru Chileke ike. ²⁸ O bujekwaru onye darwuru ekemu Mòsisu; a -duwaa èbo; ozoo èto; gbawa iya ekebe; a nmaa ya ikpe; l'e woru onye obu megbua emegbu; a ta phuduru iya obu-imemini. ²⁹ Unu leanaro g'oo-du onye lephuru Nwa ke Chileke. Onye ono bè Chileke a-kabakwaanu anu aphu; mbu onye woru mee ogbandzu ono zotoshia gua ya l'iphe, adudu nsò; bya eworu Unme-du-Nsò ono, emejeru anyi eze-iphe-oma ono nmaa phulaphula. ³⁰ L'anyi makwaru onye ono, pfuru su: "O kwa mbedua nwe emelata; o buru mu bè apfu ugwo du l'èka." Sùkwapho: "O kwa Chipfu e-kpe ndibe iya ikpe." ³¹ Mbu le-a; adaba Chileke ono, no ndzu ono l'èka bukwa iphe, gbaru g'a tsua ya ebvu.

³² Unu nyatajekwa g'o shi duru unu le mbulembu teke ono, unu humaru iphoro ke Chileke onoya. Unu nyatajekwa g'unu gude jee iphe-ehuka, du igwerigwe; unu taèlaa nshi; ophu unu ekwedu g'o kapyabe unu enya. ³³ O nwechaaru teke e shi achijechaa unu ochi; mee unu iphe-iphere l'edzudzu-oha; obenu l'ò bujeru akpadu unubedua ehù; unu agbaèla odzori ndu ophu aakpa iya. ³⁴ Unu aphu-tabejewaru ndu ophu no le mkporo g'o bu unu, no le mkporo obu. Aanakotaje unu iphe, unu nweru enweru le mgboko; unu egudeèlaa ehù-utso tagbua ya le nshi; opfu l'unu maru l'unu nweruro iphe ozo, kabaa ree, bu ophu a-nowaro ojejoje. ³⁵ Sù-a; g'okpoma shihuèkwapho unu ike g'o shihuru iya unu; unu ta abokwa obu èbo; le Chileke e-mechakwaa pfua unu ugwo iya l'iphe, ha shii. ³⁶ Iphe, mkpa iya duru unu bu ata nshi g'unu emejekwanu iphe, du Chileke l'uche; shi egube ono nata iphe, o kweru ukwe iya. ³⁷ L'ò fukwaa nwanshii onye ono, byafutajenu ono abya.

O tò noekwa odu.

³⁸ O le onye pfuberekoto
e-gude ekweta nodu
ndzu.

Teke o bukwanu l'ò
tsuphuru azu;
bè o tò dukwa mu
ree l'obu.^o

³⁹ O bekwanu l'anyi ta abudu ndu ophu tsularu azu, a-la l'iswi. Anyi buchia ndu woru onwanyi ye iya l'èka; a dzoo anyi.

^o 10:38 Gūnaa Hab 2:3,4.

Iphe, ekweta bu

11 ¹Iphe ono, bu ekweta bu: achiru upfu ye l'iphe, eele enya iya; bya aburu amakaharu l'iphe ono, a humaduru l'enya ono du pho eviya. ²Kele oo ekweta ono meru g'o gude ndiche anyi phe buru ndu ajaru ajaja l'ephe eme ree.

³Oo ekweta meru g'o gude o doo anyi enya le mgboko-a bu opfu onu be Chileke gude mee ya; mbu l'iphemiphe-a, akpurennya elegbaa bu iphe, aahumaduru l'enya be e gude mee ya.

⁴Su-a; oo ekweta Ebelu meru g'o gude o gweeru Chileke ngweja, ka ke Kenu ree. Chileke nata iya gua ya l'onye pfberekoto; o nwuhuchakpoo iphe, o meru nodu epfuelaa opfu byasu nta.

⁵O buru ekweta Inoku meru g'o gude o nodukwadro ndzu; Chileke bya ewolita iya ganwuhu te egbu iya egbugbu ophu; ebe o dudu onye maru g'o meru; kele Chileke woliwaru iya; temanu e wolia ya ono be ajaru iya ajaja lo shi emeje iphe, jiru Chileke epho. ⁶Unu maanaru-a lo to dudu onye a-du ike eme iphe, jiru Chileke epho; gbahaa l'onye obu kwetaaduru ke Chileke. Kele onye akpiritaru Chileke ntse vufutaje uzo kweta le Chileke du; kwetakwapho loo-buje ndu acho iya nu nggo.

⁷Su-a; oo ekweta Nuwa meru g'o gude o ngaberu Chileke nchi teke Chileke nmaru iya okwa iphe, e-mechaa mee nu, bu iphe, o toko humadu l'enya. O mee iphe, Chileke pfuru; kua eze ugbo, Chileke gude dzoo yee ndibe iya ndzu. O shi egube ono goshi nemadzū l'umere ndiphe du eji. O buru ekweta ono meru iphe, Chileke gude gua ya l'onye pfberekoto. Opfu le Chileke aguje ndu kwetarū nkiya le ndu pfberekoto.

⁸Oo ekweta Ebirhamu meru g'o gude o mee ge Chileke pfuru teke o kuru iya. O tugbua lufu jeshia ali, Chileke kweru iya ukwe le ya a-nu iya go buru nkiya. Ebirhamu shi l'ali iya tugbua ije; lebe ama aka ooje. ⁹Oo ekweta ono meru g'o gude o je eburu l'ali ono, Chileke kweru iya ukwe iya ono. O buru iya g'onye lwaru alwalwa. Ulo, yee Ayizaku waa Jieko pu shi ebujeru buerupho ulo, e gude ekwa mee. Ephebedua be Chileke kwekarupho ukwe-iphe lanu ono, o kweru Ebirhamu onoya. ¹⁰Liphe Ebirhamu ele enya iya bu eze mkpukpu ono, a turu okpa iya; k'opfu oo-nowaro ojejoje ono; mbu eze mkpukpu ophu bu Chileke gude aka iya tua ya g'oo-du bya egude aka iya kpu ya lonwiya.

¹¹O buru ekweta Sera l'onwiya mechakarupho g'o gude o buru nwanji, noru; ebe o tsujeduru ime jasu o noghaa atsuta ime be Chileke meeluru-a g'o du ike tsuta ime le nka. Iphe, kparu iya nu buru lo doberu Chileke l'onye apfushije ike l'iphe, o kweru ukwe iya. ¹²O buru iphe ono meru g'o gude o buru nwoke lanu ono, bu Ebirhamu mecharu buru nna, nwuru igwe oha; mbu nwoke ono shiwaa kahuwaa duwaa g'onye nwuhuru anwuhu. Unwu iya mechaa bya ajaa ajaja; ha lotu ge kpokpode du l'igwe; ha igwerigwe geja, no l'ali; buru aguta aguta.

¹³Iphe, bu ndu ono, a gushiru ono chiru upfu ye l'iphe ono, Chileke kweru phe ukwe iya ono jasu ephe nwushihu; ophu o rwukwaru phe eka teke ephe nokwadu ndzu. Obenu l'ephe humakotaru iphe ono, nokwadu enya ono bya etee eswa iya. Ephe saa ya asasa l'ephe humawaru l'ephe bu mbyambya bya aburu ndu kparufutaru uri le mgboko-a. ¹⁴Ndu epfu nno bu iphe, ephe egoshi bu l'ephe achokwadu ali, e-mechaa buru nkephe. ¹⁵Ozo bu l'ome oghoroko ali phe ono, ephe shiru futa ono shi aduje phe m'ephe achole-a uzo laphushia ya azu. ¹⁶Obenu l'eka enya du phe bu l'ali ophu ka ree, bu iya bu ophu du l'imigwe. O buru iphe ono meru g'o gude ophu iphere adudu Chileke l'ephe kuru iya Chileke phe; kele o duru mkpukpu o kwakoberu doberu phe.

¹⁷Su-a; oo ekweta Ebirihamu meru g'o gude o kweta duta nwa iya, bu Ayizaku jeshia egbugbu g'o gude gwaa Chileke teke ono, Chileke mejeru ge ya dalee ya ono. O buru onye ono Chileke kweru ukwe-iphe ono dutaru nwa lanu, o nweru jeshia egbugbu. ¹⁸O bukwaru onye-a Chileke suru: "Oo le Ayizaku be ii-shi nweru unwu nwanwanwanwanwa-a." ¹⁹Ebirihamu buerupho iphe, o lechawaru enya huma bu le Chileke a-dua ike mee Ayizaku g'o shi lonwu teta dzuru ndzu, bunu iya bu l'e -pfuje iya epfufu be Ayizaku shiwaa lonwu teta dzuru ndzu; eshinu e mechaaru o tsoru Ebirihamu laphu azu.

²⁰O buru ekweta Ayizaku meru g'o gude o goru onu-oma nu Jiekopu yee Iso; goru phe iphe, e-me l'iphu.

²¹Oo ekweta Jiekopu meru g'o gude o goru onu-oma nu unwu Jiosefu l'ehu l'ehu teme o nwuhu. O pfuru apfuru; woru mgboro iya sibe l'ali; phozeta l'eli iya; baaru Chileke eja g'o go onu-oma ono.

²²Oo ekweta Jiosefu meru g'o gude o bya l'anwuhu; o vuru uzo pfua opfu awufu, ndu Izurelu mechaaru shi l'ali Ijiputu wufu lashia ali, Chileke kweru phe ukwe iya. O bya egoshikwapho g'ee-me okpu iya m'ephe -wufuje.

²³Oo ekweta ne le nna Mosisu meru g'o gude ephe domia Mosisu onwa eto g'a nwuchaaru iya; opfu l'ephe leri iya enya l'o bu nwata, du ubvu l'enya; ophu ndzu agueduru phe emebyi ekemu, eze ndu Ijiputu turu su g'e gbuje iphe, bu nwa nwoke, onye Jiu zedaru k'ophuu.

²⁴Oo ekweta Mosisu ono meru g'o gude o vutaepho; o jika g'e te ekuhe iya nwatibe nwa nwanyi eze ndu Ijiputu. ²⁵O hataru etsoru unwu Chileke jee iphe-ehuka; eme l'anodu l'eka eh u atso iya utso eme iphe-eji; mbu eh u-utso, adudu eka onno-beru. ²⁶Iphe, o kparu eka bu l'a -nodu eme iya ewere l'opfu eh u Onye-Ndzota ono, Chileke kweru ukwe iya l'oo-bya le mgboko ono be o ka iya ree eme le ya nwekotaru eku, du l'ali Ijiputu mgburugburu. Onoo kele enya du iya l'obunggo ophu du l'iphu.

²⁷O buru ekweta Mosisu meru g'o gude o haa Ijiputu tugbushia; ophu ndzu aguduru iya l'ehu e-ghu eze ndu Ijiputu eghu. O sua eka l'obu

nọ-kirishia g'ọ -bụ l'ọ hụmaru Chileke ọnya; l'ebe abụ lẹ Chileke bụ onye aahụmaje l'ọnya. ²⁸Ọo ekweta Mosisu meru g'ọ gude o gbube ishi k'ọbo Ojeghata; teke ono, ọ sụru ndu Ízurelu l'ophu g'ẹphe woru mee nwaturu phedzuru l'iphe, bukpoọ ọnu mgbo ọlo pẹ; g'ọjọzi-imigwe, byaru egbushi ọkpara ndu Ijiputu ta adu ọkpara kẹ ndu Ízurelu, oo-gbu.

²⁹Ọo ekweta unwu Ízurelu meru g'ọ gude ẹphe wughaa l'echi ọgbú Enyimu-uswe eje l'oma alí g'onye eje l'echi gbororo. Ndu Ijiputu jeshia aghata; mini rigbushikọta pẹ.

³⁰Ọo bụru ekweta ndu Ízurelu meru g'ọ gude igbulọ, e gude kpuphee Jieriko mgburugburu daa g'ẹphe jephechaaru iya mgburugburu abalí ọsaa. ³¹Ọo ekweta, nwanýi ovuọba ono, bụ Réhabu meru g'ọ gude a haa ya; ọphu a tuko duru yẹ ndu kwefuru Chileke ike mee g'ẹphe laa l'iswi; opfu l'ọ domijeru ndu Ízurelu ono, byaru ngge lẹ mkpukpu Jieriko pho; shi egube ono dzoo pẹ.

³²?Mu e-le ole agu? ?Denu teke mu a-nodu gushiwaro Gidiyonu pẹ mẹ Beraku; mẹ Samusinu; mẹ Jiẹfuta; mbukpoọ Dévidi pẹ; mękpoo Sámelu; waa ndu mpfuchiru Chileke. ³³Ọo ekweta pẹ bẹ meru g'ọ gude ẹphe tsoo ọhamoha ọzo ọgu; lwu-kpee pẹ; bya eme iphe, pfuru ọto; bya anata iphe, e kweru pẹ ukwe iya; mee g'oduma ta adu ike kúhaa ọnu akúha; ³⁴bya egude iya zonyia ọku, ata ririri; bya egude iya nahu ndu gude ogu-echi achí pẹ k'egbugbu. Ẹphe shi bụru ndu ike te eshidu du; e mechakwanaa ẹphe bya aburu ndu ọkpẹhu du. Ẹphe shi bụru ọ-karięka l'ogu; k'ophu ẹphe shi achí-je ojogu ndu ọhozo nanu nanu. ³⁵Unwanyi, kwetaru nu hụmaru ndibe pẹ, nwushihuru nu g'ẹphe shi l'onwu tetagbaa.

Ọo duru ndu e meru l'iwe jasụ ẹphe nwuhu. Ẹphe nata sụ l'ọ -shita ọphu ẹphe a-jika Chileke g'e-shi g'a haa pẹ g'ẹphe gbalaa; g'e gbuchia pẹ ro g'ẹphe nwuhu. Iphe, kparu iya nu bu l'ẹphe ele ọnya lẹ Chileke e-mechaa mee g'ẹphe teta dzuru ndzu ọphu ka ree. ³⁶Ọo duru ndu a haru chia ọchi; chia pẹ iphe; tya pẹ mkporo; nwuru pẹ ye l'ọka mkporo. ³⁷Ọo duru ndu a tugbushiru lẹ mkpuma; duru ndu e kwobuharu ẹbo; duru ndu e gude mma gbugbushia; ẹphe shi etsojeru aghapheephọ; buri iphe, ẹphe shi eyeje bu akpo egbu mę akpo aturu. Ẹphe kparu nri; a kpa a pẹ ẹhu; mee pẹ ewere. ³⁸Mgboko du-be pẹ ẹji; k'ophu ọ to gbaduru k'ophu ẹphe a-nokota iya. Ẹphe shi anoduje aghaphe l'echięgu, e te budu ebubu mę l'eka úbvú du; ẹphe shi ebuje l'ogba mę l'obu-alí gę ndu agba ọso ndzu.

³⁹Su-a; ndu-a tukokwaaru buri ndu a suru l'ẹphe shi eme ree. Ọo buri ekweta pẹ kparu iya. Ẹphe nọelaa; ẹbe iphe ono, Chileke kweru ukwe iya ono erwuduru pẹ ẹka. ⁴⁰Ọle Chileke achiru anyi idzu, ka ree; k'ophu bu l'ọoephọ anyi l'ẹphe -tugba; teme ẹphe a-buru ndu duebe ree.

Chileke emetse anyi

12 ¹A bya l'ẹhu k'anyịbedua; iphe, bụ ndu ono tukoakwaru so-pee anyi mgburugburu g'onye urwukpu soyyaberu; agbaru anyi eze

ekebe ono. Oo ya bu g'anyi gwobe iphemiphe, bu iphe, esela anyi azu; gwobekota iphe, bukpo iphe-eji ono, ete ekwedu anyi aha eka onoya. G'anyi gude eka l'obu maa oso-amama ono, duru anyi ono. ²G'anyi tabe-kpoepho Jizosu enya gba oso obu; l'oo ya bu onye vutaru uzo k'ekweta ono; teme o buru iya e-me g'anyi gbaa ya gbafu l'ishi. Yebedua mawaru ehutu, Chileke doberu iya; o buru iphe ono meru g'o gude o kweta jee iphe-ehuka jasu a kpopyabe iya l'oswebe; o nwuhu; ophu iphere, e shi legube anwuhu ono, o nwuhuru ono mee ya adudu iphe, o bu iya. Nta-a be o jewaru anodu anoo lekutara aba-eze Chileke. ³Unu rijekponaa ke Jizosu ono, tukoru iphe-ehuka ono jegbabe. O tukoru ejo ememe, ndu iphe-eji meru iya me ejo opfu ephe pfuru iya gbagbukota le nkuchi. Unu nyataje iya g'ike ata abudu unu; ozoo su l'unu ta agbaedu oso ono. ⁴L'ogu, unu l'iphe-eji alwu be unu teke alwu-rwukwa k'ophu unu a-lwu iya nwuhu. ⁵?Unu zohawaru opfu ono, Chileke pfuru gude mee g'obu shihu unu ike l'unu bu unwu iya ono? O suru:

“Nwa mu; te edobesujekwa

l'ahuhu,

Chipfu ahutu ngu ta

adudu iphe, o bu.

Te egudejekwa l'o baru

ngu mba wata ala

azu azu;

⁶ kele o kwa onye

Chipfu yeru obu

be oohuje ahuhu.

O buru onye o nataru

g'o buru nwa iya

be oochije iphe.”^p

⁷Oo ya bu; Chileke -nodu ahutu unu ahuhu; unu tajakwa nshi; l'ahuhu ono bukwa ahuhu, nna ahuje nwa iya; kele unu bu unwu iya. ?Unu humajeru nwa, nna iya ahuduru ahuhu? ⁸Teke o bu le Chileke ta ahutu unu ahuhu g'unu maru iphe g'ohutu unwu iya ozo; oo ya bu l'unu ta abudu unwu iya; unu bu unwegirima, enwedu nna. ⁹Oobujeru; nna anyi l'eliphe-a -nodu echi anyi iphe; anyi eyeleru phe-a nsu. ?Buchia Nna anyi ophu no l'imigwe be anyi ta akabadaa eworu onwanyi nu g'anyi eshi egube ono nweru ndu. ¹⁰Nna anyi l'eliphe ahutu-tabejeepho anyi ahuhu nwapha olemole g'o du phe ree. Obenu le Chileke ahuje anyi ahuhu g'oo-duru anyi le ree; g'anyi adube ree ge yebedua. ¹¹Oobujeru teke aahu anyi ahuhu l'ooome anyi ehuka; ehutu taa tsodu anyi utso. Ndu kweru; a huta phe huta; l'emechajekwa buru ndu eme ree; bya abukwarupho ndu ehutu emechaje du guu.

Anma ọkwa

¹²Ọo ya bụ ịe-a; unu ịochinaa ẹka ono, tsuhuwaru unu mee ono; yele ọkpa ono, aphuwaa unu kpariikpari ono. ¹³Unu mechia gbororo, unu eshi g'ọ pfuru nhamunha; a -nonyaa ọkpa ono, aphụ kpariikpari ono shiswee ụzo; g'e mechia ya g'ọ gbakerehu shihu ike.

¹⁴Unu kukebeje ẹhu meje g'unu l'onnyemonye nọdu ịe nchị odo; unu aburu ndu dụ nsọ; kele onye adudu nsọ ta ayikwa huma Nnajiuphu. ¹⁵Iphe, unu a-kwaberu ẹnya bụ g'ọ tọ dụ onye a-gbakutaru eze-ipe-oma ke Chileke azu. Unu eletakwapho ẹnya g'ọ tọ dụ onye a-bya adu g'ogbarabvu-oshi, atso ilu kpo-futa l'echilabo unu bya egburwashiahaa unu ẹhu; shi egube ono merwushia igwe oha. ¹⁶Unu letakwa ẹnya g'ọ tọ dụ onye a-nodu eme ke nwanyi; ophu o dụ onye anodu elephu iphe, ke Chileke ge Iso. Le Iso gudekwa aphụ kpaakpaakpaa nri; woru ọkpara, o bụ ree nwune iya. ¹⁷L'unu maanaru-a l'e mechaaru; o choahaa ge nna iya gooru iya onu-oma. A sụ iya l'ọ gbawaru iya l'azu; kele o tọ duedu g'ooshikwadu emezi iphe, o mebyihawaru. Tobudu iya bụ; o gude ẹnya-mini ẹkwa choo onu-oma nna iya onoya; ophu o dudu.

¹⁸L'eka unu byaru ta abukwa ubvu, unu e-denyi ẹka; teme oku, nodu enwu iya phoophoophoo. Ophu o bukwa ochii ono; ozoo ẹka ono, gbahuru tsukiribaa ono be unu bataru. Ophu o bukwa oke pherephere ono byaru. ¹⁹O tọ bukwa oda opu ono; ozoo olu-opfu ono, daru g'egbigwe ono be unu numaru. Le teke ndu Izurelu numaru olu ono be epe rwo-kwaru sụ g'o to pfuhakwa yeru phe ozo. ²⁰Kele ekemu, Chileke turu be epe suru l'ọ kariru phe ẹka, bụ iya bụ ekemu suru: "O betakpo o buru anu be ẹhu iya rwutaru l'ubvu ono g'a tugbu ya le mkpuma; ozoo g'a nmagbu ya larwa." ²¹Iphe, epe humaru l'eka ono paa biribiri; k'ophu Mosisu suru: "Ndzụ agushikwa mu ike; k'ophu ẹhu anma mu anmanma."

²²O chia ẹka unu byaru bụ ubvu Zayonu; mbu mkpukpu ke Chileke, dzu ndzu; mbu Jierusalemu ophu dụ l'imigwe. Unu byapfutaru unwu-jozi-imigwe ophu bụ 'aguta aguta. ²³Eka unu byaru bukwa ẹka unwu Chileke, o dobetotawaru lonodu ọkpara dzukoru; mbu ndu e deru epha phe l'ekwo l'imigwe. Unu byapfutawaru Chileke; onye bụ iya e-kpe onnyemonye ikpe. Ndu unu byapfutaru bụ ndu nwuhuhawaru nu, pfube-rekoto; ndu Chileke meru g'ephe duebe ree l'iphe iya. ²⁴Su-a; onye unu byapfutaru bukwa Jizosu; onye bụ iya gudegbabe Chileke yele nemadzu l'ogbandzu ophu ono; unu byapfutakwapho mee ono, o gbashiru loswebbe onoya, bụ mee ophu egoshi iphe, ka ree eme le ke Ebelu.

²⁵Ọo ya bụ g'unu kwabe ẹnya g'unu ta jika angaberu onye ono, epfu opfu onoya nchị. Leshinu ndiche anyi phe anahuduru ikpe Chileke; opfu l'ephe te eyeduru onu l'iphe ono, a loru phe ẹka le nchị le mgboko-a be anyibedua taa nahakwa me o -buru l'anyi jikaru onye ono, no l'imigwe

alọ anyi ẹka lẹ nchị onoya. ²⁶Teke ndiche onoya bẹ olu-opfu iya nmakotaru eliphe mgburugburu jijijijii; obenu lẹ nta-a bẹ o pfuwaru sù: “Ugbo lanufua bẹ mu a-nmafua eliphe jijijijii; nmachaa nmaa imigwe.” ²⁷Chileke sùru l’ò “ugbo lanufua.” Ugbo lanufua ono, o pfuru ono goshiru l’iphe ono, o meshiru ono bẹ oo-mekota g’ò nmaa jijijijii; l’oowofu iya. Oo ya bụ gẹ ndu ophu anmaduru jijijijii anodukwanu. ²⁸Oo ya bụ g’anyi keleje Chileke ekele; kele o nwaru anyi ẹka o bụ eze; mbụ ẹka adudu iphe sùru iya anma jijijijii. G’anyi keleje iya; gudeje atsu ebvu akpabiri iya; woda onwanyi ali; kwabeje iya ùbvù; ²⁹lẹ Chileke anyi bukwa oku, ekepyashije iphe, o bapfuru.

Eme iphe, dọ Chileke ree

13 ¹Unu ta ahakwa n-yemobu unu yeru unwanu unu ono. ²Unu ta azohakwa akwajeru ndu byaru abyabya ebyaa; l’o dukwaru ndu gudechawaa l’ephe akwaa ebyaa; ephe kwaru iya unwu-ojozi-imigwe; ophu ephe amadu. ³Unu nyatajekwapho ndu mkporo; g’o dujekwapho unu g’o bụ unu no mkporo obu. Unu nyatajekwapho ndu eje iphe-ehuka; g’o dujekwapho unu g’o bụ unu eje iphe-ehuka obu.

⁴G’alulu bukwaru iphe, akwabe ùbvù; g’iphe, bụ ndu alu alulu te emerwushijekwa iphe-azee phe; kele nwoke eme ke nwanyi; ozo nwanyi, eme ke nwoke; me ndu eri ogori bẹ Chileke a-nmakwa ikpe.

⁵Unu te eyenukakwa okpoga enya. G’iphe, unu nweru jijeekwapho unu ephe. Lẹ Chileke pfuakwaru iya lonwiya sù: “Mu ta agbahakwa ngu ẹka; ophu mu a-gwobekwa ngu.” ⁶Oo ya bụ; unu g’anyi pfushijenu ike pfuje opfu-a; g’anyi ta atsujekwa ebvu epfufu iya. G’anyi pfuje sù:

“Oo Chipfu bụ onye eyeru
mu ẹka;
ndzụ ta abyadu agu mu;
nemadzụ ta adudu iphe,
oomebata mu.”

⁷Unu nyataje ndu ono, vu ọzo goshi unu ọzo ono, bụ iya bụ ndu ono, ziru unu ozi-oma Chileke ono. Unu kpo egomunggo okpolohu; nyata g’ephe shi anoduje eme teke ephe no ndzụ jasụ ephe nwuhu; g’ekweta unu dukwa gẹ nkephe. ⁸Jizosu Kéreshi bẹ bụ onye ono, o bụ unyaphu; bya aburu iya ntanu-a; o jee l’abu iya jasụ lẹ tuutuutu lẹ mimiimii. ⁹Unu te ekwekwa g’iphe eezi ezizi, dugbaa iche iche shi uswe bya akpo-swee unu ọzo. O dọ ree g’anyi gude eze-iphe-oma, Chileke eme shihu obu ike. Eme nsọ nsọ, tso nri tee mekwa g’obu shihu anyi ike; l’o toko dọ-swekwa onye tsojeru iya egube ono, o yejeru ẹka.

¹⁰Anyi nwekwaru oru-ngweja bụ ẹka ndu egwekwaduru Chileke eja l’ulo-ekwa ono ta agbaduru g’ephe ria iphe, shi iya nù. ¹¹Onye-ishi uke Chileke phe egudeje mee unwu anu, e gburu egbugbu gude abahu lẹ

Èka-kakòta-adù-nso l'eze-ùlo Chileke; g'o gude iya gwee eja gwefu iphe-èji; obenu l'anù onò, a phùwaru aphùphu onò bẹ eewotajẹ lufu alufu je l'èka eebudu ebubu je akpoo ya oku. ¹²Ọ buru iphe onò meru g'o gude Jizosu nòdukwapo l'azù mkpukpu jee iphe-èhuka nwùhu; g'eeshi g'oo-gude mee ya safu iphe-èji ndiphe. ¹³Ọo ya bu; unu g'anyi jepfu iya l'azù mkpukpu g'a tuko anyi l'iya mee iphe-iphere. ¹⁴Kẹle ọ tọ dudu mkpukpu, anyi nweru l'eliphe-a, bu mkpukpu ophu l'a-dù ojejoje; ọ chia iphe, meru nù bu l'anyi achọ mkpukpu ophu abya nù. ¹⁵Ọo ya bu; g'ọ tọ dukwa teke anyi a-ha etuje Chileke epha; g'etu epha onò aburu eja, anyi shi l'èka Jizosu egwe. Ọo epha onò, anyi etu iya onò a-buru iphe, shi anyi l'onu, egoshi l'anyi buwaa ndu nkiya. ¹⁶Unu ta ahakwa eme iphe, dù ree; ophu unu ahakwa egudeje iphe, unu nweru yeru nwibe unu eka; keke ọo egube ngweja onò bu ophu dù Chileke ree.

¹⁷Unu meje iphe, ndu-ishi unu sùru g'unu meje; m'obeta ọ nọdu atsu unu l'èhu ememe. L'ọ kwa ndu onò, bu ndu-ishi onò anọduje eche ndzù unu echeche; eshinu ephe e-mechaa pfulu l'iphu Chileke doo g'ephe j-taberu ozi èhu unu. Unu -nọdu emejewaa iphe, ephe sùru g'unu meje bẹ ephe e-gude èhu-ùtso jee ozi phe onò. Teke odumeka bẹ ephe a-gbẹkwa atsù ude eme iya; onò ta adudu urwu, ọo-baru unu.

¹⁸Unu pfujekwaru nuru anyi Chileke. Ophu anyi makaharu bu l'obu ta anmadu anyi ikpe; ebe ọ dudu teke ọ tọ buedupho g'anyi mee iphe, dù ree l'iphemiphe, anyi eme ememe bẹ anyi eshibeje ite iya. ¹⁹Iphe, mu arwo-shikpoo unu ike; ununna mu; bu g'unu pfuje nù Chileke; ge Chileke kwe ge mu byapfuta unu egwa.

Epfu anu Chileke

²⁰Ge Chileke onò, bu iya emeje g'èhu dù guu onò; mbu onye onò meru ge Nnajiuphu anyi, bu Jizosu Kéreshi shi l'onwu teta dzuru ndzù onò; bu iya bu Eze onye eche aturu onò, l'èche aturu onò; ọ buru mee, ọ gbashiru teke onò, ọ nwuhuru onò bẹ o gude mee ukwe-iphe, Chileke kweru tuko-be l'ogbandzu yele nemadzù g'o vuru ire jasù lẹ tuutuutuu lẹ mijiimii onò; ²¹mee g'unu dube ree l'iphemiphe, bu iphe, dù ree, unu eme; g'unu meje iphe, bu uche iya. Ge Chileke shikwapo Jizosu Kéreshi l'èka mee iphe, dù iya ree l'obu anyi. G'ajaja buru ke Kéreshi jasù lẹ tuutuutuu lẹ mijiimii. Nokwa g'ọ dù.

Ekele, e gude akpochi ishi ekwo-ozia

²²Ọ kwa arworwo bẹ mu arwo unu; ununna mu; sù g'unu takwaa nshi nuna ozi-a; l'ekwo-a, mu deru unu-a ta adukwa ogologo. Ọo ya bu g'oomee unu g'obu shihu unu ike. ²³Iphe, mu eme g'unu maru bu lẹ nwane anyi, bu Timoti, e shi tuchia bẹ a haakwaru. Ọ -bya egwa bẹ mu l'iya a-tuko swiru me mu -byatashia unu agbaphe.

²⁴Unu kelechaaru mu iphe, bukpoo ndu-ishi unu me iphe, bukpoo ndu bu ndu ke Chileke. Unwunna anyi ndu Itali l'ekelekwapho unu.

²⁵Ge Chileke meeru unu eze-iphe-oma g'unu hakotakpoo. Nokwa g'odụ.